

Agar aapko bhi lagta hai ki aap ek achhe communicator ho toh ek baar check karlo kahin aap bhi yeh galtiyan toh nahi kar rahe. Kyunki maine dekha hai zadataar log daily basis par yeh 3 specific mistakes karte hain jo unhe boring bana deti hain.

Pehli sabse badi galti jo log aksar karte hain woh yeh ki har conversation mein khud ko uppar batana. Jab koi aapse kehta hai "Yaar aaj office mein boss ne bohot daanta" aap turant bolte ho "Arre yeh toh kuch nahi, mere saath toh aur bura hua tha." Yeh hota hai conversational narcissism, ki saamne wala banda apna dukh share kar raha tha aur aap usse competition karne lage. Par dhyaan rakhna log aapke paas validation ke liye aate hain, comparison ke liye nahi. Jab aap har story ko apni taraf ghuma doge toh saamne wala feel karega ki uski baat mayne hi nahi rakhti. Jabki asli communicators pehle baat ko sunte hain, phir relate karte hain. Jaise "Bhai, boss ka behavior toh sach mei frustrating hota hai. Ab tumhare saath kya hua woh batao." yeh approach dikhata hai ki aap sirf apni story share karne ka wait nahi kar rahe balki genuinely interested ho unki baaton mein.

Doosra point hai Invisible Interruption. Isme aap directly saamne wale se kuch nahi bolte ho lekin apne actions se uski baat kaat dete ho jaise koi aap se baat kar raha ho aur aap phone check karne lago ya kahi aur dekhne lago toh yeh ek message deta hai bolne wale insaan ko ki aap uski baat mei interested hi nahi ho. Aur jab aap baar-baar esa karte ho toh saamne wale ko lagta hai ki uski baat pe koi dhyaan nahi de raha aur dheere-dheere woh bolna hi band kar deta hai.

Teesra point hai harr cheez ka solution dene lagna. Maine dekha hai kai baar samne wala sirf apna dard share kar raha hota hai aur log turant solution mode mein chale jaate hain. Jaise aapka dost aapko baat bata raha hota hai ki uski girlfriend se ladaai ho gayi aur aap direct "Are yaar simple hai, tu usse baat hi mat kar" ya "Next time aisa-aisa karna, sab set ho jaayega." Par kabhi socha hai usne aapse solution manga bhi tha ya nahi. Is baat ko samjho ki har conversation ka maksad solution dhoondhana nahi hota, kuch baatein sirf sunne ke liye hoti hain. Aur jab aap sunne ke bajaye bas gyaan dene lagte ho toh saamne wala aapse emotionally disconnect hone lagta hai. Isliye harr cheez mei solution dena band karo aur kabhi kabhi bass baton ko sun bhi lo.

Yeh 3 galtiyan sunne mei chhoti lag sakti hain par inki wajah se bade-bade conversations bekaar ho jaate hain. Aur yeh skills sirf networking ke liye nahi hai, yeh aapki logo se day-to-day relationships ko bhi achha banati hain. Isliye next time jab aap kisi se baat karo toh sirf shabdon se nahi, samajh ke jawab dena shuru karo. Aur yaad rakhna kisi bhi conversation mei wahi jeet-ta hai, jo sunna janta hai.